

俄交涉啓之也。蓋天下惟專制之國。其政府每不能自省其國力。俄國因不自知而誤。以爲極強。遂至一無所畏。中國因不自知而誤。以爲極弱。遂至無所不畏。夫以一無所畏者與無所不畏者遇。則必不能爲合理之交涉。以此地球兩絕大之國而日爲此不合理之交涉。則全地球之人皆不免各懷疑懼。而思有以防制之。天下從此多事矣。故此兩國之政府不惟害其本國。而天下之人亦莫不受其害焉。今幸矣。日俄之戰。勝負已定。議和之日。亦已非遠。可以表明專制不如立憲之據。日俄議和之日。其全地球之局面。又一大變之機乎。蓋自中國以東海濱地贈俄之後。羣山萬壑。至此一東。前此之因。至此並已結果。而此後之事。則又將以此爲因。雖此事局面之大。爲亙古所未有。而我中國人亦切不可以國力微弱之故。噤不一言。蓋前此之大禍。旣爲我國所貽。則此後之大禍。我國當思所以弭之。日俄之和議。政府其勿再告中立哉。

論聯俄派主意之變遷 錄乙巳五月二十五日中外日報

聯俄聯日。爲我國外交上一至重要之問題。更仆迭興者。前後凡十餘年。其是非未有所決也。歷考此十餘年間。主聯俄者大都執政之大臣。主聯日者大都草野之游士。故聯日之事。未及見諸施行。其於中國之利害。尙無所證。而聯俄之事。則自李文忠以來。已事事見諸國

際。其利害如何。已爲薄海所周知。而吾人所身受矣。然而其結果尙未至也。故聯俄聯日之說。仍相持而不決。此二黨是非之決。其卽以日俄戰爭之勝負決之乎。今者非日俄交戰勝負已決之時乎。然則此二派是非之決。亦在此時矣。日俄之戰爭。爲日勝而俄敗。則吾國之政策。將聯日而拒俄。揆以人情。殆必出此。雖然。本報以爲此日俄和議將成未成之時。正兩黨決其死命之日也。欲測將來。先明已往。歷考此十餘年來。聯俄黨之舉動。雖經無數失敗。而其所持宗旨。始終無所變易。惟其口說。則隨事不同。據吾人所目擊耳聞者言之。甲午夏。我國始與日人遇於海上。其時聯俄黨已密爲運動。其後果有俄德法聯合阻日割遼之役。此爲聯俄黨最得意事。其時舉朝上下。倚俄人爲帝天。雖有智者。百口辨其非計。而事實如彼。無以奪也。至借款之說出。而俄之詭謀露。政府信俄之心。亦稍息矣。而聯俄黨持之自若。至鐵路銀行之說出。而俄之詭謀再露。其時國中稍有智識者。皆知之矣。而聯俄黨持之仍自若。至租借旅順大連灣之說出。而俄之詭謀盡露。幾乎無可解說。而聯俄黨持之仍自若。直至俄人重占奉天。直言不少諱。五洲各國。僉有俄人將不利於中國之言。至此聯俄黨。雖有厚顏妙辯。亦不能再爲俄人諱。於是另易一說。不以爲俄人仁愛之可信。而以爲俄人威猛之可恃。其言以爲中國今日。決不能無所倚而自立。而所倚之國。非俄卽日。然日終必爲

俄之所吞噬。故雖明知俄之不可信。而仍不能不聯俄。此說也。其於甲午之說。已大相矛盾矣。而無如俄人自交戰以來之情事。其不能保全聯俄黨之體面。更甚於甲午甲午之役。俄尚有阻日割遼一事。可以爲聯俄之口實。直至重占奉天。其說始破耳。而此次甲辰之戰。則自首至尾。竟無一次之勝。可爲聯俄黨運動之機會者。聯俄黨於此。計無復之。乃不得不目戰事消息爲盡係謠言。以爲萬一欺人計。自開戰以來。彼黨種種之論說。言猶在耳。人多聞之。亦無俟本報之贅述。卽至今日波羅的海艦隊已歸殲滅。勝負已無翻覆之機。而其持論仍無移易。噫嘻。豈真聯俄黨之堅毅不回有如是哉。夫使其果無所爲而爲。則識雖不足。而其人吾猶敬之。而無如其致此之由。有不可問者也。本報觀其發源之如是。沿革之如是。則知其聯俄之心。斷不改易。而必當於日俄議和之日。有所密謀。其謀之目的。必欲使中日之交離。而俄仍能得利。此則聯俄黨區區忠俄之苦心也。其機之發當不遠矣。

中國自古相傳政治法律之宗旨。大都以一人之大私成天下之大公。故凡百政事皆在公與私之間。而公私二義之本源。殆有不可令人研究者。故其義遂缺人之生。其間者往往不知有公私之辨。其因私人之意見。不顧公事之益而排除之。因私人之交誼。不顧公事之損而保全之。此等舉動。在吾國已成屢見不鮮之事。幾視爲人道所當然。古今具在。可覆案也。

及其大蔽。乃特此義。以爲外交之宗旨。數十年來。我之執政。其論外交。每不省外國所處之地位。與我國關係。奚若。而但論外國之外部大臣及駐使之對付我國人。其交情。奚若。凡國家至大之問題。統以交情決之。而所謂交情者。又非真能窺其人之肺肝也。不過見其使臣至外。署咆哮跳躑。時作惡狀。卽戒曰。某國與我交情不好。見其使臣至外。署厚其貌。嫗其言。頻爲飲食饋贈之舉。則又歡然相謂曰。某國與我交情甚好。當其認爲交情不好之時。有纖芥之故。毫髮之事。皆惕然以爲兵船已至。大敗已構。奉令承教。惟恐或後不能省。其時之某國。斷不能與我開戰也。及當其認爲交情至好之時。則忘其爲外國。忘其爲別種。忘其爲利害相反。而望其爲不責報之施。無所爲而爲之助。並不知此時之某國。斷不能如我意也。以此之故。故誤以爲交情不好。則懼所不必懼。自困而爲天下笑。誤以爲交情甚好。則望所不可望。望不副而大覺隨之。其動輒致禍之原。則誤以私交爲國際而已。數十年來之事。其誤於此二念者。可勝道哉。

論政府宜竭力援助外交官 錄乙巳第九號外交報

試遊乎今日之朝。而接乎今日之外交官。觀其言語丰采。學識智慮。以視外國之外交官。瞠乎後矣。此我國清議。所以凡遇外交事件。無不歸獄於外交官。而外交官亦無辭以自解也。